



Broj: 11-07-6-2498-4/2024

Dana: 3. juli 2024. godine

Visoko sudsko i tužilačko vijeće Bosne i Hercegovine, u sastavu: Lagumdžija Halil, Obradović Aleksandra, Bogunić Sanin, Bošnjak-Glizijan Ljiljana, Šabić Mustafa, Petković Snježana, Forca Srđan, Fabić Željka, Martinović Davor, Kunosić Amila, Bogojević Duška, Hadžić Lejla, odlučujući o prijedlogu za privremeno udaljenje od vršenja dužnosti člana Visokog sudskog i tužilačkog vijeća Bosne i Hercegovine Sarajlić Saše, koji je podnio Ured disciplinskog tužioca, broj: UDT DS 013911 24 dana 25. juna 2024. godine, u skladu sa čl. 17. tač. (6) a u vezi sa čl. 7. st. (4) Zakona o Visokom sudskom i tužilačkom vijeću Bosne i Hercegovine („Službeni glasnik BiH“ br. 25/04, 93/05, 48/07, 15/08, 63/23 i 9/24), imajući u vidu čl. 32o. st. (3) Poslovnika Visokog sudskog i tužilačkog vijeća Bosne i Hercegovine („Službeni glasnik BiH“ broj: 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24 i 27/24), na vandrednoj sjednici održanoj dana 3. jula. 2024. godine, donijelo je slijedeću

ODLUKU

Prijedlog za privremeno udaljenje od vršenja dužnosti člana Visokog sudskog i tužilačkog vijeća Bosne i Hercegovine Sarajlić Saše, broj: UDT DS 013911 24 od 25. juna 2024. godine, **nije usvojen.**

O b r a z l o ž e n j e

Ured disciplinskog tužioca (u daljem tekstu: UDT) je dana 25.06.2024. godine, podnio Visokom sudskom i tužilačkom vijeću Bosne i Hercegovine (u daljem tekstu: VSTV BiH/Vijeće) Prijedlog za privremeno udaljenje od vršenja dužnosti člana VSTV-a BiH Sarajlić Saše, broj: UDT DS 013911 24, kojim je predloženo da se donese odluka o udaljenju do okončanja disciplinskog postupka koji je protiv imenovanog pokrenut podnošenjem disciplinske tužbe UDT-a broj: UDT DD 013311 24 od 25. juna 2024. godine

Prijedlog je podnesen na osnovu člana 32o. Poslovnika VSTV-a BiH „Privremeno udaljenje od vršenja dužnosti člana Vijeća“ i to stav (3) kojim je propisan krug aktivno legitimisanih subjekata za podnošenje prijedloga za privremeno udaljenje člana Vijeća. Predmetni Prijedlog sadržajno je podnesen na osnovu odredbe člana 7. stav (3) tačka b) Zakona o VSTV-u BiH u vezi sa članom 77. tačka d) Zakona o VSTV-u BiH. Predmetnim, uzročno-posljednično povezanim, pravnim osnovom, propisano je da Vijeće može privremeno udaljiti od vršenja dužnosti člana Vijeća „zbog okolnosti na osnovu kojih se sudija ili tužilac može privremeno udaljiti od vršenja dužnosti prema članu 77. ovog zakona“, tj. „ako je pokrenut disciplinski postupak za disciplinski prekršaj, a Vijeće utvrdi da se disciplinska odgovornost ne može na pravi način utvrditi, a da se sudija ili tužilac privremeno ne udalji od vršenja dužnosti tokom postupka“.

U obrazloženju razloga za podnošenje predmetnog prijedloga za privremeno udaljenje od vršenja dužnosti člana VSTV-a BiH, istaknuto je da je dana 25. juna 2024. godine UDT na osnovu člana 67. Zakona o VSTV-u BiH podnio disciplinsku tužbu protiv tužioca Federalnog tužilaštva Federacije Bosne i Hercegovine Sarajlić Saše, zbog disciplinskog prekršaja iz člana 57. tačka 22. Zakona o VSTV-u BiH: „ponašanje u sudu ili tužilaštvu i izvan suda ili tužilaštva koje šteti ugledu tužilačke funkcije“.

U skladu sa odredbom člana 67. Zakona o VSTV-u BiH „pokretanje disciplinskog postupka i podnošenje tužbe“ disciplinski postupak se pokreće pred prvostepenom disciplinskom komisijom podnošenjem tužbe.

Pored istaknute funkcije tužioca, Sarajlić Saša je od jula 2022. godine i član VSTV-a BiH. U obrazloženju razloga koji prema mišljenju UDT-a opravdavaju usvajanje prijedloga za privremeno udaljenje od vršenja dužnosti člana VSTV-a BiH, ukazuje se na nadležnosti VSTV-a BiH iz člana 17. tačke 4. i 5. Zakona o VSTV-u BiH, a što nadalje podrazumijeva da Sarajlić Saša kao član VSTV-a BiH ima dužnosti aktivnog učešća u radu VSTV-a BiH što podrazumijeva prisustvo na sjednicama VSTV-a BiH, učešće u disciplinskim komisijama, stalnim komisijama, podvijećima i drugim radnim tijelima, slijedom čega UDT ukazuje da je neminovno da prilikom obavljanja svih pobrojanih dužnosti stupa u kontakt i komunikaciju (formalnu i neformalnu) sa drugim članovima VSTV-a BiH, koji će u skladu sa Zakonom o VSTV-u BiH potencijalno učestvovati u radu disciplinskih organa u ovom predmetu.

Zbog svega, UDT ukazuje na ispunjenost uslova za donošenje odluke o privremenom udaljenju Sarajlić Saše od vršenja dužnosti člana Vijeća do okončanja predmetnog disciplinskog postupka, u cilju očuvanja integriteta i ugleda VSTV-a BiH kod profesionalne zajednice ali i šire javnosti, te stvaranja preduslova za vođenje objektivnog i nepristrasnog disciplinskog postupka protiv imenovanog.

Sumirajući, prijedlog je prema logiciranju UDT-a podnesen kako u interesu Vijeća i javnosti, tako i u interesu Sarajlić Saše.

Predmetni prijedlog je aktom predsjednika VSTV BiH, broj: 11-07-6-2498-2/2024 od 27.06.2024. godine, dana 27.06.2024. godine dostavljen Sarajlić Saši na izjašnjenje. Disciplinski tuženi/protivnik prijedloga za privremeno udaljenje od vršenja dužnosti Saša Sarajlić, je putem punomoćnice advokatice Čović Lejle, dana 28. juna 2024. godine dostavio izjašnjenje.

U izjašnjenju je istaknuto da je podneseni prijedlog za privremeno udaljenje Sarajlić Saše od vršenja dužnosti člana VSTV-a BiH do okončanja predmetnog disciplinskog postupka nedovoljno obrazložen i nepotkrijepljen valjanom argumentacijom. Ističe se da iz sadržaja prijedloga, neosnovano, proizlazi zaključak UDT-a da nastavak obavljanja funkcije člana VSTV-a BiH implicira samorazumijevajuće miješanje u rad drugih članova VSTV-a BiH koji će potencijalno učestvovati u radu disciplinskih organa u ovom predmetu.

Time se, po stavu tuženog/protivnika prijedloga implicira uticaj na članove VSTV-a BiH kao osobe od neupitnog integriteta, što smatra apsurdnim. Kako u prijedlogu nisu navedeni jasni i valjani razlozi, to protivnik prijedloga/disciplinski tuženi ukazuje na izostanak opravdanih razloga za usvajanje Prijedloga UDT-a, zbog izostanka razloga koji bi ugrozili provođenje disciplinskog postupka u slučaju nastavka obnašanja funkcije člana VSTV-a BiH od protivnika prijedloga. Protivnik Prijedloga UDT-a ukazuje da bi na nivou informacija koje je UDT iznio u prijedlogu, a za koje cijeni da su nedostatne, privremeno udaljenje bilo određeno na nivou automatizirane pretpostavke bez dostatnog obrazloženja, što bi bilo u kontradiktornosti sa uspješnim rezultatima rada i historijatom radnog vijeka protivnika prijedloga/disciplinski tuženog.

Na samom kraju ukazuje da je saglasan da u periodu trajanja vođenja ovog disciplinskog postupka ne bude imenovan od strane VSTV-a BiH za člana disciplinskih komisija o disciplinskim prekršajima tužioca i sudija.

Zbog svega, predlaže da prvostepena disciplinska komisija Vijeća odbije kao neosnovan prijedlog UDT-a za privremeno udaljenje od vršenja dužnosti člana VSTV-a BiH.

Na vanrednoj sjednici Vijeća održanoj 3. jula 2024. godine, imajući u vidu odredbu člana 7. stav (3) Zakona o VSTV-u BiH kojom je propisano da Vijeće može privremeno udaljiti od vršenja dužnosti **člana** i to: (b) zbog okolnosti na osnovu kojih se sudija ili tužilac može privremeno udaljiti od vršenja dužnosti prema članu 77. ovog zakona, Vijeće je odlučivalo o Prijedlogu za privremeno udaljenje od vršenja dužnosti člana Vijeća, Sarajlić Saše.

Predmetno pitanje je razmatrano na sjednici Vijeća koja je otvorena za javnost u skladu sa odredbom člana 32e. u vezi sa odredbom člana 32m. stav (1) Poslovnika VSTV-a BiH. U

toku diskusije razmatrana je potreba za zatvaranjem ove tačke dnevnog reda za javnost, u skladu sa odredbom člana 32e. stav (2) tačka b) Poslovnika VSTV-a BiH.

Imajući u vidu izraženi interes javnosti i razumijevanje uloge regulatora pravosudnog sistema (Vijeća) o potrebi transparentnosti procesa odlučivanja po zaprimljenom prijedlogu za privremeno udaljenje od vršenja dužnosti člana Vijeća, a u cilju osiguranja zaštite ugleda i digniteta institucije VSTV-a BiH, ali i potrebe očuvanja percepcije o nezavisnosti, nepristrasnosti i profesionalnosti u smislu odredbe člana 3. Zakona o VSTV-u BiH, Vijeće je odlučilo da razmatranje prijedloga za privremeno udaljenje od dužnosti člana Vijeća ostane javno.

Predmet odlučivanja i razmatranja u ovoj vrsti postupka (odlučivanje po prijedlogu za privremeno udaljenje od vršenja dužnosti člana Vijeća) nije mogao biti sadržaj disciplinske tužbe broj: UDT DD 013311 24 od 24. juna 2024. godine, koji je UDT dostavio kao dokaz uz Prijedlog za privremeno udaljenje od vršenja dužnosti.

Blagovremeno odlučujući o podnesenom prijedlogu, imajući u vidu odredbu člana 32o. stav (4) Poslovnika VSTV-a BiH, predmetni prijedlog za privremeno udaljenje od vršenja dužnosti člana VSTV-a BiH nije usvojen, zbog nepostojanja potrebne dvotrećinske većine glasova članova Vijeća koji su prisutni i koji glasaju za donošenje odluke o privremenom udaljenju.

Naime, odredbom člana 7. stav (4) Zakona o VSTV-u BiH propisan je naprijed citirani standard zahtijevane kvalifikovane većine za usvajanje prijedloga za privremeno udaljenje.

Kako je prilikom odlučivanja o predmetnom Prijedlogu UDT-a bilo prisutno dvanaest (12) članova Vijeća (naznačenih u uvodu ove Odluke), uz samorazumijevajuće izuzeće imenovanog Sarajlić Saše iz razloga notorne prirode, prilikom razmatranja Prijedloga UDT-a, to je bio ispunjen uslov kvoruma nužno prisutnih članova Vijeća, u skladu sa odredbom člana 14. stav (1) Zakona o VSTV-u BiH. Za izricanje privremenog udaljenja od vršenja dužnosti člana Vijeća, glasalo je sedam (7) prisutnih članova Vijeća, dok je pet (5) članova Vijeća glasalo protiv.

Imajući u vidu takav epilog odlučivanja po podnesenom Prijedlogu UDT-a, nisu se ispunili uslovi za izricanje privremenog udaljenja od vršenja dužnosti člana Vijeća, Sarajlić Saše, zbog nepostojanja potrebne dvotrećinske većine glasova članova Vijeća koji su prisutni i koji glasaju.

Imajući u vidu izostanak minimalno potrebne kvalifikovane većine glasova za usvajanje prijedloga za privremeno udaljenje od vršenja dužnosti, to se ima smatrati da se nisu stekli zakonski uslovi za izricanje privremenog udaljenja o vršenja dužnosti člana Vijeća, tj. za donošenje odluke o privremenom udaljenju člana Vijeća.

U vezi sa odredbom člana 32o. stav (7) Poslovnika VSTV-a BiH kojom je propisano da se odluke o privremenom udaljenju člana Vijeća objavljuju na internet stranici Vijeća, a imajući u vidu da je javnost upoznata sa činjenicom da je UDT podnio prijedlog za privremeno udaljenje, te da je postupak razmatranja prijedloga UDT-a pred Vijećem bio javan, ova Odluka će se objaviti na internet stranici Vijeća.

Imajući u vidu navedeno odlučeno je kao u dispozitivu ove odluke.

PRAVNA POUKA:

Protiv ove odluke žalba nije dopuštena.

